

**Broj: UP1-06-13-1-51-04/20**  
**Mostar, 19.08.2020. godine**

Na osnovu člana 21., člana 37., člana 84., člana 87. stav (1) i stav (2) i člana 88. stav (1) Zakona o električnoj energiji u Federaciji Bosne i Hercegovine („Službene novine Federacije BiH“ broj 66/13, 94/15 i 54/19), člana 2. Zakona o korištenju obnovljivih izvora energije i efikasne kogeneracije („Službene novine Federacije BiH“ broj 70/13 i 5/14), člana 20. stav (1) i člana 23. stav (1) Statuta Regulatorne komisije za energiju u Federaciji Bosne i Hercegovine („Službene novine Federacije BiH“ broj 24/14 i 91/15), člana 8. stav (1), člana 32. stav (4) i člana 42. stav (1) Poslovnika o radu Regulatorne komisije za energiju u Federaciji Bosne i Hercegovine („Službene novine Federacije BiH“ broj 29/14, 31/16 i 84/19), člana 78. Pravilnika o javnim raspravama i rješavanju zahtjeva, sporova i žalbi („Službene novine Federacije BiH“ broj 57/12, 71/14 i 31/16), člana 18. Pravilnika za izdavanje dozvola („Službene novine Federacije BiH“ broj 2/17 i 39/20), člana 4. stav (1), člana 5 i člana 8. Pravilnika o metodologiji i načinu obračuna regulatornih naknada za imaoce dozvola - Prečišćeni tekst („Službene novine Federacije BiH“ broj 94/19), postupajući po Zahtjevu za obnovu dozvole za snabdijevanje električnom energijom – dozvole II reda broj UP1-06-13-1-51/20 od 24.06.2020. godine podnosioca zahtjeva HEP Energija d.o.o. iz Mostara, ul. Vukovarska bb., Mostar, zastupanog po zakonskom zastupniku Krešimiru Krešiću, Regulatorna komisija za energiju u Federaciji Bosne i Hercegovine – FERK je 19.08.2020. godine na XIII redovnoj sjednici donijela sljedeće

## **R J E Š E N J E**

1. Izdaje se Dozvola za snabdijevanje električnom energijom – dozvola II reda podnosiocu zahtjeva HEP Energija d.o.o. iz Mostara.
2. Dozvola za rad izdaje se na period od 30.10.2020. godine do 29.10.2025. godine, sa uslovima dozvole koji čine njen sastavni dio.
3. Sastavni dio ovog rješenja čini dozvola iz tačaka 1. i 2. ovog rješenja.
4. Imalac dozvole je obavezan plaćati regulatornu naknadu u periodu važenja dozvole na način i u iznosu koji utvrdi FERK posebnom odlukom.
5. Ovo rješenje je konačno, te se objavljuje na oglasnoj tabli i internet stranici FERK-a, a dispozitiv ovog rješenja u „Službenim novinama Federacije BiH“.

## **O b r a z l o ž e n j e**

Dana 24.06.2020. godine FERK je od podnosioca HEP Energija d.o.o. iz Mostara pod brojem UP1-06-13-1-51/20 primio Zahtjev za obnovu dozvole za snabdijevanje električnom energijom – dozvole II reda.

Prilikom pregleda potpunosti podnesenog zahtjeva, u skladu sa članom 9. Pravilnika o javnim raspravama i rješavanju zahtjeva, sporova i žalbi, FERK je utvrdio da podneseni zahtjev nije potpun u smislu člana 12. Pravilnika za izdavanje dozvola. Zbog navedenog, FERK je

postupajući u skladu sa članom 10. Pravilnika o javnim raspravama i rješavanju zahtjeva, sporova i žalbi uputio podnosiocu zahtjeva Obavještenje o nedostacima podnesenog Zahtjeva za obnovu dozvole za snabdijevanje električnom energijom – dozvole II reda broj UP1-06-13-1-51-01/20 od 10.07.2020. godine, te mu odredio rok radi otklanjanja u obavještenju naznačenih nedostataka i upozorio ga na posljedicu propuštanja. Postupajući po obavještenju, podnosilac zahtjeva je dostavio dopis primljen u FERK 16.07.2020. godine pod brojem UP1-06-13-1-51-02/20 uz koji je dostavio traženu dokumentaciju i obrazloženja, a na osnovu kojeg je FERK utvrdio da je podneseni zahtjev potpun i da su se stekli uslovi za objavu obavještenja za javnost o nacrtu dozvole.

Na osnovu provedenog postupka tokom kojeg je izvršena pažljiva analiza svih činjenica i podnesenih dokaza na osnovu kojih se moglo utvrditi stanje stvari FERK je, u skladu sa članom 16. Pravilnika za izdavanje dozvola, pripremio Nacrt dozvole za snabdijevanje električnom energijom - dozvole II reda po zahtjevu broj UP1-06-13-1-51/20 od 24.06.2020. godine podnosioca HEP Energija d.o.o. iz Mostara. Na osnovu člana 92. stav (2) Zakona o električnoj energiji u Federaciji Bosne i Hercegovine, FERK je Odlukom broj UP1-06-13-1-51-03/20 od 23.07.2020. godine usvojio Nacrt dozvole za snabdijevanje električnom energijom - dozvole II reda, te Obavještenje za javnost o opštoj raspravi o Nacrtu dozvole za snabdijevanje električnom energijom - dozvole II reda, kojom je ovaj nacrt upućen u proces javne rasprave. Ovom odlukom je imenovan voditelj postupka i zamjenik voditelja postupka, te je utvrđeno i da su zainteresovana lica imala mogućnost dostaviti svoje pisane komentare na Nacrt dozvole za snabdijevanje električnom energijom - dozvole II reda na adresu FERK-a ili na elektronsku adresu, u periodu od 24.07. do 03.08.2020. godine do 13:00 sati, kao i da su lica koja imaju direktan interes učestvovati u postupku izdavanja dozvole, pod uslovom da im je interes različit od opšteg javnog interesa, imala mogućnost podnijeti zahtjev za sticanje statusa umješaća na adresu FERK-a ili na elektronsku adresu, u periodu od 24.07. do 03.08.2020. godine do 13:00 sati.

Do ostavljenog roka za dostavu pisanih komentara i za podnošenje zahtjeva za sticanje statusa umješaća, odnosno do 03.08.2020. godine do 13:00 sati, u FERK nisu primljeni pisani komentari na Nacrt dozvole za snabdijevanje električnom energijom - dozvole II reda, niti je primljen zahtjev za sticanje statusa umješaća.

Dalje, članom 4. i članom 5. Pravilnika o metodologiji i načinu obračuna regulatornih naknada za imaoce dozvola propisana je dinamika i način obračuna regulatorne naknade za imaoce dozvola za obavljanje elektroprivrednih djelatnosti. Članom 8. istog pravilnika propisan je način utvrđivanja regulatornih naknada za imaoce dozvola za obavljanje elektroprivrednih djelatnosti, odnosno način donošenja rješenja kojim se utvrđuje pojedinačni iznos godišnje regulatorne naknade za svakog imaoća dozvole. O obavezi plaćanja regulatorne naknade imaoću dozvole se ispostavlja posebno obavještenje.

Na osnovu obrade Zahtjeva za obnovu dozvole za snabdijevanje električnom energijom – dozvole II reda podnosioca HEP Energija d.o.o. iz Mostara i dokumentacije priložene uz zahtjev, utvrđeno je da podnosilac zahtjeva ispunjava kriterije iz člana 87. stav (1) Zakona o električnoj energiji u Federaciji Bosne i Hercegovine, odnosno člana 25. Pravilnika za izdavanje dozvola. Na osnovu navedenog, u dozvoli koja je predmet ovog rješenja podnosiocu zahtjeva postavljeni su, u skladu sa članom 26. i članom 30. Pravilnika za izdavanje dozvola određeni uslovi. Navedeni uslovi uvažavaju potrebu, ali i obavezu HEP Energija d.o.o. iz Mostara da u rokovima propisanim u uslovima dozvole za rad za obavljanje licencirane djelatnosti snabdijevanje električnom energijom iste ispuni, u cilju zadovoljenja propisanih kriterija.

Na osnovu navedenog, odlučeno je kao u dispozitivu ovog rješenja.

**POUKA O PRAVNOM LIJEKU:**

Protiv ovog rješenja podnosilac zahtjeva može tužbom pokrenuti upravni spor kod Kantonalnog/Županijskog suda u Mostaru u roku od 30 dana od dana prijema rješenja. Tužba se predaje sudu direktno ili mu se šalje poštom preporučeno. Tužba se može izjaviti i na zapisnik kod navedenog suda ili bilo kojeg drugog suda.

**PREDSJEDNIK FERK-a**  
**Mile Srdanović**

**Dostaviti:**

- HEP Energija d.o.o. iz Mostara (poštom preporučeno uz dostavnicu)
- Sektoru za tehničke poslove i licence